

## ПАРАСАТ БИГІНДЕ

С.Р. ЕСІМЖАНОВА

*Экономика ғылымының докторы,  
профессор*

Қазіргі кезде болып жатқан экономикадағы түбегейлі өзгерістерде, халқымыздың тұрмысының жақсаруында, ел деп жанын сала еңбек етіп жүрген, халқымыздың біртуар перзенті, 70 жылға толып отырған академик Кенжеғали Әбенұлының да ғалымдық үлесі зор.

Қазақ елінің ұлттық мақтаныштары Әліби Жангелдин, Амангелді Иманов, Әлібек Майкөтовтер жөніндегі ел аузындағы ақиқат әңгімелерге, білардың ел бақыты үшін күреске толы іс-әрекеттерін көңіліне тоқып өскен, зерделі де зерек Кенжеғали Әбенұлы орта мектепті күміс медальмен бітіріп, Қазақ мемлекеттік университетінің (қазіргі Әл-Фараби атындағы Ұлттық университет) экономика факультетіне оқуға түседі. Ұлы Отан соғысы елге әкелген ауыр зардаптарды әлі ұмыта қоймаған, ауыр тұрмысты сезіп өскен ауыл баласы оқу мен ғылымның алғашқы баспалдақтарына тез төселіп, университетте белсенділік көрсетіп, Сталин атындағы стипендия иегері атанды. Ол университет өмірінде болып жататын түрлі мәдени шараларға, Бүкілодақтық және республикалық ғылыми конференцияларға белсене қатынаса отырып, 1960 жылы университетті үздік бітіріп шықты.

Кенжеғали Әбенұлы өзін өте үлгілі де дарынды студент ретінде таңыта білді. Сондықтан, оған экономика ғылымының докторы, профессор Тарбай Шәукенбаев назарын аударып, университет оқытушысы етіп қалдырды.

1963 жылы ол Г.В. Плеханов атындағы Мәскеу халық шаруашылығы институтының аспирантурасына қабылданды. Өз ғылыми-зерттеу жұмысын жүргізе отырып, ол осы институттың материалдық-техникалық жабдық-

тау факультетінің партия ұжымы хатшысының орынбасары болып істеді. Осындай басшылық жұмысты атқара жүріп, Кенжеғали Әбенұлы ғылыми зерттеуін сәтті аяқтап 26 жасында кандидаттық диссертациясын профессор Н.Д. Фасоляқтың жетекшілігімен абыроймен қорғап шықты. Оның елінің болашақ ірі ғалымы болып қалыптасуына Ресейдің атақты ғалымдары Э.Ю. Локшин, Н.Д. Фасоляк, А.А. Иотковский, П.В. Смирнов зор әсерін тигізді.

Кенжеғали Әбенұлы жас кезінен-ақ өзінің алғырлығын, зерделігін көрсетті. Ол – жиырма сегіз жасында экономика ғылымының кандидаты, отыз тоғыз жасында ғылым докторы, қырық жасында профессор атағын иеленсе, қырық тоғызында Ұлттық Ғылым академиясының корреспондент-мүшесі болып сайланады.

Біз шәкірттері оның республика жоғары оқу орындарындағы ұйымдастырушылық, ғылыми және педагогтық қызметтері мен қабілетін көріп те, көңілімізге тоқып, ұстаздан үйрене жүрдік. Кенжеғали Әбенұлы өзінің көп жылғы ғылыми-педагогикалық қызметінің тең жартысын Алматы халық шаруашылығы институтында (қазіргі Т. Рыскулов атындағы Қазақ экономикалық университеті) өткізді. 1966-1982 жылдары ол осы институттың факультеті деканының орынбасары, партия комитетінің хатшысы, оқу ісі жөніндегі проректоры болып қызмет атқарды. Ол осы оқу орны ұйымдасқан күннен бастап, оның ірі білім ордасына айналуына бар күшін сарқа жұмсаған талантты ұйымдастырушы. Біз ұстаздың істеген көптеген еңбектерінің куәсіміз.

Сагадиевтің ұйымдастырушылық қабілеті, іскерлігі Целиноград (қазіргі С. Сейфуллин атындағы Қазақ агротехникалық университеті)

ауыл шаруашылығы институтының ректоры болып қызмет атқарған кезде айқын көрінді. Тың өлкесінде егін шаруашылығы қарқынды өріс алғанда, ол институт ұжымын ғылыми жетістіктерді өндіріске енгізуге жұмылдырып, оның материалдық-техникалық базасын нығайтуға күш салды. Өзінің істеген ерен еңбегінің арқасында оның тың өлкесінде беделі артып, тек институт ұжымында ғана емес, бүкіл сол аймақта ірі тұлға ретінде танылды. Уақыттан озық жүретін Кенжеғали Әбенұлы институтта оқудың жаңа модульдік жүйесін енгізіп, шетелдік оқыту тәсілінің бүгінгі үздік үлгісін сол кезде-ақ үйлестірген. Оның енгізген көп жаңалықтарының бірі – дәнді дақылдардың жаңа түрлерін шығаратын, республикада бұрын болмаған биотехнологиялық орталықты құруы еді. Оның еңбегін бағалай отырып, институт ғылыми ұжымы бидайдың жаңа түрін ғалымның атымен атады.

Кеңес Одағы кезінде материалдық-техникалық жабдықтаудың өндіріс үшін маңызы өте зор болатын. Кенжеғали Әбенұлының кандидаттық және докторлық жұмыстары осы саланың ғылыми мәселелеріне арналған. Ғалым Мәскеудің Г.В. Плеханов атындағы халық шаруашылығы институтының ғылыми кеңесінде 1977 жылы елімізде бірінші болып материалды-техникалық жабдықтаудың экономикалық тиімділігін арттыру проблемаларына арналған докторлық диссертациясын қорғады. Ғалымның осы кезде жазған еңбектерінде материалдық-техникалық жабдықтауды басқару, оның экономикалық тиімділігін арттыру, көтерме сауданы дамыту мәселелері көрсетілген. Кенжеғали Сағадиев Қазақстан экономист-ғалымдарының арасынан бірінші болып сол кезде-ақ осы көтерме сауданың келешекте маңызы зор екенін атап айтқан. Бұл қазіргі нарық кезінде де өз өзектілігін жоғалтқан жоқ. Ғалымның осы еңбектерінде көрсетілген ғылыми тұжырымдар сол уақыттағы халық шаруашылығының әртүрлі салаларында кеңінен қолданылды. Кенжеғали Әбенұлы Алматы халық шаруашылығы институтында материалдық-техникалық жабдықтау кафедрасын ашып, оның меңгерушісі болды. Сол жылдардан бастап біздің елімізде Кенжеғали Сағадиевтің ерен еңбегінің арқасында материалдық-техникалық жабдықтау саласының ғылыми іргесі қаламды. Осы ғылымның дамуына оның әріптестері – Беккулов А.Б., Нурсейт А.Ш., Сухова Л.Ф., Алтынбаев Б.А.,

Хожаназаров К.Х., шәкірттері – Митяшкина Л.И., Ватрунина И.Ю., Ергожина З.М., Набиев Е.Н., Мадиярова Д.М., Карибджанов Е.С., Бекбосынов В.К., Смагулов А.С., Истаева А.А. және т.б. өз үлестерін қосты.

Академик Сағадиев – ғылым мен жоғары білім беру саласының ірі ұйымдастырушысы және басқарушысы. Қазақстандағы төрт белгілі жоғары оқу орнының ректорлық (UIB президенті) қызмегін атқаруы, ҚР Ұлттық Ғылым академиясының президенті болып істеуі, көптеген ғылым кандидаттары мен докторларын дайындап шығуы, ғылым мен білімді тәжірибеде ұштастыруы оның қажымас қажырлы еңбегінің нәтижесі.

1990 жылы Қазақстан Ұлттық Ғылым академиясының президиумының бас ғылыми хатшысы қызметін атқарып жүргенде республика ғылымының даму саясатының тұжырымдамасын жасауға бар күш-жігерін жұмсады. Оның басшылығымен жұмысшы то-бы «Қазақстандағы ғылым және ғылыми саясат туралы» Заңның жобасын дайындады, ол Ғылым академиясының кейбір аумақтық бөлімшелерінің ұйымдастырылуына өз еңбегін қосты.

Қазақстан мемлекетінің экономикасы мен әлеуметтік өмірінде нағыз реформалар басталған 1992 жылы Кенжеғали Әбенұлы Қазақ мемлекеттік экономикалық университетінің (1993 жылы Қазақ мемлекеттік басқару академиясы болып аталды) ректоры болып тағайындалды.

Бұл еліміздің экономикасын ойдағыдай дамытатын мамандарға аса зәру болған шақ еді. Осыған байланысты Кенжеғали Сағадиев экономист мамандар дайындау тұжырымдамасын түпкілікті өзгерте отырып, нарыққа керекті мамандар білімін әлемдік деңгейге көтеру мақсатымен университеттің көптеген оқытушыларын шетелдерге жіберіп, оқы-тып алды. Олардың көпшілігі қазір экономика ғылымдарының докторлары болды. Солардың ішінде – Т. Рысқұлов атындағы Қазақ экономикалық университетінің оқу жөніндегі проректоры, экономика ғылымдарының докторы С.С. Арыстанбаева, оқу-әдістемелік жұмысы бойынша проректоры, экономика ғылымдарының докторы А.М. Сейтказиева, «Менеджмент» кафедрасының меңгерушісі, экономика ғылымдарының докторы – Т.С. Сатқалиева, «Әлемдік экономика» кафедрасының меңге-рушісі, экономика ғылымдарының докторы Карибджанов Е.С. және

не т.б. Шетелде оқып келгендердің ішінде мен де бармын. Америка оқу орындарында оқығанымыз біздің келешегімізге үлкен нәр болды, кәсіби шеберлігімізді арттырды.

Кенжеғали Сағадиев оқытушылардың әлеуметтік жағдайын көтеру мақсатымен олардың жалақысын екі есеге көтерді. Академияда оқу процесі толық жаңартылды, бұрынғы факультеттердің орнына менеджмент, маркетинг, халықаралық экономикалық қатынастар, қаржы, бухгалтерлік есеп, экономикалық кибернетика деген оқу-ғылыми кешендері ұйымдастырылып, жаңа кафедралар ашылды, соларға сәйкес жаңа оқу жоспарлары және нарықтық оқытудың тың бағдарламалары дайындалды.

Академиктің қолдауымен осы оқу орнында жүргізілетін ғылыми-зерттеулердің сапасы артты. Нарық талабына сай ғылыми орталықтар ашылды, солардың ішінде – Қаржы-банк менеджменті институты, Экономикалық социология және Маркетинг орталығы.

Кенжеғали Сағадиев экономикалық білім беруді талапқа сай жүргізу ісінде, шетелдік серіктестердің техникалық қолдауына сүйеніп үш үлкен жобаны іске асыруға кіріскен еді, соның ішіндегі ең ірісі ТАСИС жобасы бойынша 5 млн ЭКЮ болатын ірі халықаралық грантты ұтып алды. Жоба оқытушыларды нарықтық экономиканы терең білуге, олардың қабілеттерінің артуына және шет елдерде оқуына көп үлес қосты.

Қазіргі Т. Рыскулов атындағы Қазақ экономикалық университеті Қазақстандағы экономикалық оқу орындарының қарашаңырағы және таңдаулысы болуына, оның нарық заманының талабына орай жаңа бағытпен дамуына Кенжеғали Сағадиевтің қосқан үлесі ерекше деп білеміз.

Кенжеғали Әбенұлының еліміздің экономикасын реформалау жолдары, оның көптеген мәселерін шешуге арналған жан-жақты еңбектері көп, сондықтан академиктің осы саладағы ғалымдар ішінде шоқтығы биік деп айтуға болады. Оған оның егемен мемлекетті енді құрып жатқан және қазіргі кездегі Қазақстан экономикасы жайлы жазған ғылыми еңбектері дәлел. Бұл ретте 1995 жылы Ұлттық Ғылым академиясының хабаршысында жарияланған «Қазақстандағы экономика реформасы: тұжырымдамалық дәлелдеудің кейбір жолдары» деген еңбегінде ол – осы реформаны жүргізудің

концептуалдық негіздеу жолдарын көрсетеді. Ғалым сол кездедегі көптеген ғылыми еңбектерінде Қазақстанның экономикасын түбегейлі өзгертіп, оның өркендеу стратегиясын жаңартуда жаңа көзқарас, қоғамның жаңа парадигмасына сай экономикалық теория, Қазақстанның ұлттық ерекшеліктеріне негізделген Батыс елдерінің экономика модельдерін қайталамайтын тиімді реформа керектігін атап көрсетті. Ғалым Қазақстанның ертеңгі күні тек экономикадағы түбегейлі өзгерістерде жатқанын, ол үшін іргелі ғылымдар деңгейін көтеру қажет екенін атады.

Академиктің жетекшілігімен жасалған Қазақстан азаматтарының заман талабына қарай экономикалық мінез-құлқын қалыптастыру тұжырымдамасы – еліміздегі нарықтық қатынастардың дамуына ықпалы зор болды. Мемлекеттік саясат жөніндегі Ұлттық кеңеске ұсынылған және «Сұхбат» журналында (1995) жарияланған «Арқасүйер күш – орта тап» деген мақаласында, «Средний класс: «тест» на современность: история, теория, статистика» деген кітабында нарықтық экономика дамуындағы орташа топтың рөлін, оның қоғамды қайта жаңғырту үшін ұзақ мерзімдік стратегиясын жасау жолдарын ұсынады.

1992 жылы Кенжеғали Сағадиев Қазақстан сияқты егемен елдің өзіне ұлттық ақша (валюта) қажеттігін, оны енгізуді ұзаққа созбау керектігін айтып, Қазақстан Республикасы президенті Н.Ә. Назарбаев пен сол кездегі премьер – министр С.А. Терещенконың атына хат жолдады.

Ғалым ел дамуында байқалып отырған индустриалдық мешеулікті зердесінен өткізіп, жерімізге тиімділігі төмен, табиғат-ананы бүлдіретін тиімсіз технологияларды тарту саясатының айрықша қауіпті екенін ескертті. Ол өзінің – «Қазақстанның ғылыми-техникалық тәуелсіздігі», «үміт ұшқыны сөнбесе игі» деген мақалаларында бұл туралы ауқымды әңгіме көтерді. Ұшан-теңіз байлығымызды өзге емес өзіміз дұрыс пайдалану үшін ғылыми-техникалық жүйе құру – қазіргі уақытта ең бір қажетті мәселе екенін дәйектеді. Оның бұл тәрізді сол кезде жазған көптеген еңбектері Қазақстан экономикасындағы ғылыми тұжырымдарды байытты.

Кенжеғали Сағадиевтің Қазақстан Республикасы Ғылым Академиясының президенті болып сайлануында бірнеше ерешеліктер бар. Солардың біреуі – Ұлттық Ғылым академиясының

тарихында экономист-ғалымның тұңғыш рет баламалық негізде президент болып сайлануы. Ол Ұлттық Ғылым академиясының бүкіл жұмысын түбегейлі қайта құрды, іргелі және қолданбалы зерттеулерді ұйымдастыруға мақсатты үлесін қосты. Ғылыми қызметкерлерді қайта аттестациядан өткізе отырып, оларды әлеуметтік қорғау үшін маңызды шаралар қабылдады.

Академияның даму стратегиясының негізі етіп ғылым мен техниканы мүмкіндігіне қарай ел егемендігін күшейту жолдарына бағыттауға және осы мақсатқа жетуге ден қойды.

Осының барлығы К. Сағадиевтің дарынды ғалым-оқымысты және талантты ұйымдастырушы екенін көрсетеді. Ғалым Қазақстан экономикасын тұрақты түрде дамытудың басты саласы – жаңа білім беру мен технологиялық прогресс екенін алға тартты. Қазақстанда экономикалық реформа жүргізу мәселелері іргелі теориялық негіздеуді қажет ететінін айта отырып академик оны халық мәдениетінің бір бөлігі, ұлт өркениеттілігі дәрежесінің көрсеткіші, әлеуметтік прогрестегі, сондай-ақ техника, технология және өндірістегі жаңа өзгерістерді сезіп отыратын халықтың көзі мен құлағы деген қағиданы ұсынды.

Көрнекті оқымысты экономика саласынан басқа гуманитарлық ғылымдардан, яғни, тарих, әдебиет, өнер, тағы басқалардан хабарының молдығы, оның шетелдерде, Қазақстанда өткен әр түрлі симпозиумдарда, конференцияларда, ұлы адамдарға арналған айтулы сессияларда сөйлеген сөздері мен баяндамаларынан анық байқалып келеді. Экономикамызды, ғылымымызды дамытып, білім беру ісін жетілдіру, байланыстарды баянды ету мақсатында АҚШ, Ұлыбритания, Франция, Германия, Оңтүстік Корея, Пәкістан, Иран, Израиль, Қытай және басқа көптеген елдерге барып, тәжірибе алмасу арқылы еліміздегі игілікті жұмыстарға ұйытқы болуы да бөлек-жара айтуға тұрады.

Академик Сағадиев 1996 жылы Қазақ мемлекеттік ауыл шаруашылығы институты мен Алматы мал дәрігерлік институтының негізінде құрылған Қазақ мемлекеттік аграрлық университетінің ректоры болып тағайындалды.

Аграрлық университеттің де жұмысын Кенжеғали Әбенұлы түбірімен қайта құрды. Ғылыми жүйеде істеп жүрген, ауыл шаруашылығынан тәжірибесі мол ғалымдармен, мамандармен кеңесіп, оқу орнында ашылатын жаңа мамандықтардың саны мен сапасын

анықтады. Уақыт талабына қарай биотехнология, аграрлық заңтану, агроэкология, халықаралық аграрлық экономикалық қатынастар тәрізді жаңа мамандықтар өзінің жері, суы, малы, қаражаты бар шаруашылық иелерінің жаңа легін дайындау мақсатымен фермерлер мектебі өмірге келді.

Тыңайтқыштың өлшеусіз себілуінен және эрозияға ұшырауынан жер-ананың беретін өнім-түсімі төмендеп, құнарлығы жойылып бара жатқаны жасырын емес. Жерді тыңайту, экология жағынан тазарту ауадай қажет. Осыны жүзеге асыратын ауылшаруашылық мамандарын әзірлеуге ғалым үлкен күш салды. Жастарға ауыл шаруашылығы мамандығын игеруге жан-жақты жағдай жасай отырып, маман кадрларды аграрлық экономиканы көтеруге бағыттауы академик Сағадиевтің ұрпақ тәрбиесін, өмір мұраты деп түсінгені ұлағатты ұстаздың негізгі ой арманының бірі деуге болады.

Кенжеғали Әбенұлы 2002-2004 жылдары Халықаралық бизнес университетінің президенті, содан кейінгі уақытта – парламент Мәжілісінің депутаты, оның Қаржы және бюджет комитетінің төрағасы болды. Қазір Парламент Мәжілісінің төртінші шақырылымының депутаты.

Осы кездерде ол өзін экономикамыздың алдында тұрған мәселерді шеше білетін жоғары дәрежедегі қайраткер ретінде де көрсетті. Кенжеғали Сағадиевтің осы кездерде жазған көптеген еңбектері мен істері Қазақстан экономикасының тұрақты даму және өсу, ұлттық экономиканың бәсекеге қабілеттілігін көтеру жолдарына, бюджет жүйесін өркендетуге, еліміздің Дүниежүзілік сауда ұйымына кіру мәселерін шешуге арналған. «Реформы: аналитический взгляд» деген төрт томдық еңбегінде Қазақстандағы нарық экономикасының даму жолдарын жан-жақты талдап, келешекте әлемдік бағытқа сәйкес келетін жаңа экономиканы дамыту бағыттарын алға тартады.

Біздің еліміз жаңа экономика құру үстінде. Жаңа экономика дегеніміз, адам еңбегінің тиімділігін көтеретін жаңа технологиялармен жарақталған, жоғары біліктілікті қажет ететін, терең білім мен ғылым негізінде дамитын тиімді экономика. Кенжеғали Сағадиевтің көрсендігі осындай экономиканы іс-жүзіне асыратын жолдарды атап көрсетуінде.

Шикізат емес, терең өңделген бұйымдар жасап, әлемдік сауда кеңістігіне шығу керектігі әркімге мәлім. Ғалым бұл мәселені шешудің жан-

жақты жолдарын осы еңбегінде түбегейлі түрде көрсетеді.

Кенжеғали Әбенұлы халық қамын ойлайтын тұлға. Ол Қазақстанның барлық байлығын, ішкі мүмкіндігін, ұстанып отырған саяси және экономикалық қағидаларын елдің тұрмысын жақсартуға, қоршаған ортаны қорғауға, білім алуға мүмкіндік жасауға, денсаулық сақтау жүйесін жоғары деңгейде қалыптастыруға бағыттайтын әлеуметтік мемлекет құру қажет деген ғылыми тұжырымдамасынан көрінеді.

Тағы бір ауқымды проблема ретінде академик экономикадағы салық ауыртпалығын азайту, өңдеуші өндіріс салаларына, ауылшаруашылық өнімдерін өңдейтін кәсіпорындарға, орта және шағын бизнес субъектілеріне табыстың қомақты бөлігін құрайтын корпоративтік салық және қосымша құн салығы үлкен ауыртпашылық жасайтынын, осы шешілсе көлеңкелі экономика көлемінің азаятынын өз еңбектерінде көрсетеді. Осы мәселе туралы Президент Н. Назарбаевқа жазған өзінің хатында, бұрынғы премьер-министр Д. Ахметовке, экономика және бюджеттік жоспарлау министрі К. Келімбетовке жолдаған депутаттық сауалында көтерді. Нәтижесінде қосымша құн салығы төмендеді. Ал Қазақстан Президентінің биылғы жылғы Жолдауында осы салық деңгейін орта және шағын бизнес үшін төмендету керек деген шешімі Кенжеғали Сағадиевпен басқа да ғалымдардың, іскерлердің армандарын ақтап отырған шешім деп айтуға болады.

Кенжеғали Әбенұлының билік орнына жіберген көптеген экономикалық мәселелерге қатысты хаттары бойынша ресми орындармен қабылданған шешімдер – оның Қазақстандағы экономикалық реформаларды белсенді түрде жүргізуші ғалым-реформатор екендігін көрсетеді.

Қазіргі кезде 146 мемлекет мүше болып отырған Дүниежүзілік сауда ұйымына кіру біздің экономикамызға әртүрлі әсер тигізері күмәнсіз. Академик Сағадиевтың айтуынша бұл Ұйымға қосылу басқа елдермен терезесі тең мемлекет ретінде іс-қимыл жасауға, шығарылған өнімді шет елдерге тежеусіз сатуға, сонда кездесетін әр түрлі алалауларға халықаралық ережелер негізінде тойтарыс беруге, бізге қарсы қолданып отырған демпингке, елімізге жаңа технология мен қосымша инвестициялар тартуға, тауарды тиімді жағдайда өндіруде

басқа елдермен бәсекені арттыруға мүмкіндік туғызатынын атап өтеді. Сонымен қатар осы Ұйымға қосылу кейбір әділетсіздіктерге әкелуі мүмкін. Осы Ұйымның заңдары мен ережелерінде үміткерлер экономикасының даму деңгейі, жалпы ерекшелігі жан-жақты ескерілмеген. Кеден саясаты туралы алатын міндеттеріміз бен жауапкершілігімізді, оның ережелерінің ауылшаруашылығына тигізер әсерін, шетелге шығудағы мемлекет тарапынан керек қолдаулар мен саясатты айқындау, кейбір азық-түлік өнімдеріне баж салығын жоғарылату, заңдарымызды қайта қарап толықтыру сияқты дәйекті мәселелерді шешу керектігін өз еңбектерінде алға тартады. Аталмыш Ұйымға тиісті дайындықсыз кірген бұрын Совет одағында болған кейбір егемен елдердің әзір ұтқандары аз, ұтылғаны көп екені мәлім. Сондықтан да бізге үлкен дайындық, терең зерттеулер, ұлттық мүддені қорғайтын дәлелді де табанды келіссөздер, экономикамыздың болашағына қолайлы міндеттерді айқындау қажет деген ғалымның тұжырымдары шүбәсіз деуге болады.

Кенжеғали Сағадиев – сирек эрудициялы, жан-жақты білімді ғалым. Оның ғылыми еңбектері экономиканың әр түрлі салаларын қамтиды. Соның ішінде – ауылшаруашылығы мәселесіне көп көңіл бөліп отыр. Ауылдағы шешімін таппаған мәселелерді атай отырып, академик Сағадиев ауыл техникалары мен технологияларының жаңа да жоғары тиімді түрлерін пайдалану, асыл тұқымды мал өсіру, түсімі мол дәнді дақылдар пайдалану, шаруашылықтың тиімді жүйелерін қалыптастыру, ауыл өнімдерінің сапасын көтеру – ұзақ уақыт қажымай-талмай шешетін проблемалар деп алға қойып отыр. Ұлттық байлықтың сарқылмас көзінің бірі – ауыл шаруашылық өнімдерін, оның терең өңделген түрлерін шет елдерге шығарып, сату. ДСҰ-ның қоятын талаптарының күрделілігіне байланысты осы өнімдерді солардың талаптарына сай сәйкестендіру қажеттігін де ғалым атап өтеді.

Академик Сағадиев Қазақстан экономикасының тұрақты дамуына ғалым ретінде де, депутат ретінде де өз үлесін қосты деп санаймыз. Оған оның көптеген еңбектері де, істері де дәлел.

Қазақстан Республикасының Президенті Н.Ә. Назарбаевтың экономикамыздың алдына қойған басты мақсаты – дүние жүзінде бәсекеге қабілетті 50 елдің қатарына қосылуы. Осыған

